

Тарихы терең, білімі биік

Әл-Фараби атындағы Қазақ ұлттық университетінің тарихы сонау 1934 жылдан бастау алады. Бүгінде оқу орнының құрылғанына 80 жылдан астам уақыт өтті. Осы кезең аралығында университетте көптеген факультет ашылды. Атап айтар болсақ, география және табиғатты пайдалану, биология және биотехнология, физика-техникалық, механика-математика, химия және химиялық технология, филология және әлем тілдері, журналистика, тарих, археология және этнология, философия және саясаттану, экономика және бизнес, заң, шығыстану, халықаралық қатынастар, жоғары оқу орнына дейінгі білім беру, медициналық факультеттер осы сала бойынша жас мамандарды даярлап, қанаттандырып ұшырды. Сондай-ақ, университетте 40 кафедра, 8 жаратылыстану ғылыми бағытындағы инженерлік бейінді зертхана, 10 жаратылыстану-техникалық, 17 әлеуметтік-гуманитарлық саладағы ғылыми-зерттеу институттары мен орталықтар, зерттеу лабораториялары, 135 ғылыми үйірме, 14 бизнес инкубатор жұмыс істейді.

Елбасымыздың қолдауымен университет аймағында ғылыми кітапхананың ашылуы және оның жаңа технологияларымен жабдыкталуы ізденіс үстінде жүрген студенттерге көп көмек. Сонымен қатар жаңа формациядағы университетті құру мақсатында ұлы ойшыл әл-Фарабидің ізгілікті қала туралы ілімі негізге ала отырып «Al-Farabi university – smart city» жобасының іске асырылуы, «Керемет» студенттерге бір терезелі қызмет көрсету орталығы және медицина-диагностика орталығының ашылуының бастама болды. Бұл жерде жастар өздеріне қажетті барлық ақпаратты және құжаттарды рәсімдей алады және студенттер орталығында денсаулықтарын тексеруге мүмкіндігі бар. Бұл инфрақұрылымды дамытып, жаңа информациялық технологияларды енгізу арқылы болашақ жастардың, ертеңгі күні осындай

салауатты идеяларды мемлекетке әкелу үшін қолға алынған іс.

Әл-Фараби атындағы Қазақ ұлттық университеті Алатаудың баурайында, Есентай өзенінің сағасында, алқабы 90 гектар жерді алып жатқан аумақта орналасқан. Университетте Ө. Жолдасбеков атындағы Студенттер сарайы, мұражай, спорт алаңдары, жаттығу кешендері, кітапхана, жаттақханалар орналасқан. Бір сөзбен айтқанда, білім алуға ынтық студенттер үшін қолайлы жағдай жасалған. Әл-Фараби мұражайынан ғұлама бабамыздың қалдырған мол мұрасын көруге болады.

Жастардың бойына мәдени құндылықтарды сіңіріп, адамгершілік, патриоттық тәрбие беруге айрықша көңіл бөлінеді. Осы орайда отансүйгіштікке, салауатты өмір салтын ұстануға, табиғатты аялауға, ұлттық салт-дәстүрді насихаттауға бағытталған іс-шаралар өтіп тұрады.

Университет аясында «Грин Кампус», «Салауатты өмір салты», «Айналаны нұрландыр», «100 кітап» атты астары терең жобалар орындалуда. Елбасымыз айтқандай: «Қазір бой жарыстыратын заман емес, ой жарыстыратын заман» болғандықтан, ғаламдану үдерісінен қалмай, дамыған елдермен иық теңестіру үшін ғылым мен білімнің жаңа технологияларға қол жеткізуі маңызды болып саналады. Соңғы деректерге сүйенсек, QS World Universiti Ranking сараптамасы бойынша әл-Фараби атындағы Қазақ ұлттық университетінің рейтингісі 236-шы орынға көтерілді. Әлемнің 300 үздік университетінің қатарында тұрғандығы – ел Президенті Н. Назарбаевтың «Қазақстан – 2050 даму бағытындағы» қойылған талаптарын орындаудағы айқын көрініс. Әрине, мемлекетімізге мұндай инновациялық бағыт тудырған, мемлекеттің мүддесіне жұмсалған күш біріншіден, Елбасымыздың салиқалы саясатының арқасында, екіншіден, университет басшысы, академик Ғалымқайыр Мұтановтың жетекшілігімен және еңбек ұжымының біртұтастығымен, іскерлігінің арқасында жеткен игі жетістіктер.

Тілеуғабыл АБАЙДЕЛЬДИНОВ,
жетекші мұғалім, заң
ғылымының кандидаты, доцент
Қайрат ӘЛІМЖАН

Әл-Фараби атындағы Қазақ ұлттық
университеті заң факультетінің
2-курс магистранты